

12.3.85 GR

En regurdientscha da

Giusep Martin Riedi, Sedrun



(G.F.) Ils 19 da schaner 1985 annunzia il zenn da s. Vigeli a Sedrun la mort da nies convischin: Giusep Martin Riedi, oriunds da Tschamut. Leu eis el naschius ils 17 da schaner 1909, sco davos dad 8 fargliuns ord la lètg da Giusep Martin e Barla Catrina Riedi, nasch. Geronimi. En quella bun'aria – al pei dil Badus – ei nies preziau trapassau carschius si ensemen cun ses fargliuns ed ha giu ina bial'affonza. Las scolas ha el frequentau a Selva, sur Crestas. E lu ha ei giu num beinspert segidar cun geniturs e fargliuns, pertgei las entradas fuvan pintgas. Ins era denton endisais cun las semplas relaziuns da viver, veva zacons

tiers e rustgava mintga pitgogna per ch'ins hagi pavel per ils liungs unviarns. Inaga staus ord scola, ha ei giu num far il fagot ed ir a fadigiar zacons raps.

Il trapassau mava gia da lezs temps bugen cun skis. Inaga ha el giu in accident. Suenter ha ei giu num seschaneviar. El ei ius naven en differentas plazzas sco fumeagl. Duront zacons unviarns eis el staus a S. Murezi, nua ch'el mava cun schletra cun gronds signurs dils nobels hotels. Cu ins ha baghegiu las gallarias dadens Tschamut per la viafier dalla Furca, ha quei purtau era ad el buna fadigia tier la firma Caprez.

1941 ei Giusep Martin Riedi vegnius elegius dalla Regenza sco viè cantunal per il stradun Selva-Alpsu. Cheu ha ei tuccau da far sia obligaziun en da tuttas auras. 1943 eis el maridus cun Christina Deplazes, da S. Benedetg/Sumvitg. Da quella lètg ei sortiu in affon – oz il capo-caustaziun dalla viafier dalla Furca a Sedrun.

La sanadad ha fatg empau quitaus. 1961 e 1963 sto el sesuttametter a duas operaziuns. Denton, luvrau ha el tochen 1967, surpurtond dabia mals. 1979 han ei vendiu lur casa a Tschamut ed ein vegni a Sedrun ella biala habitaziun nova damaneivel dil fegl Giusep. La malsogna ha denton murthergiu vinavon nies bien Giusep. Ils 19 da schaner 1985 eis el vegnius liberaus da tuts mals terresters. Ils 21 da schaner 1985 han ins purtau ed accumpignau el alla fossa. Alla cara consorta ed al fegl cun famiglia e parents nossa resentida condolientscha.